

Ri carta ri xutz'ibaj ri apóstol San Pablo cheque ri hermanos ri yec'o pa ruch'ulef Galacia

Ri Pablo nutz'om tzij

¹ Yin Pablo, ru-apóstol ri Jesucristo. Man vinük tñj c'a xecha'on vichin richin quiri' xinoc apóstol. Ni man vinük tñj chuka' ri ye takayon-pe vichin. Ri takayon-pe vichin ja ri Ajaf Jesucristo y ri Katata' Dios, ri Dios ri xbanun chin ri Jesucristo que xc'astñj-pe chiquicojol ri caminaki'. ² Rix hermanos, ri nimol c'a ivi' pa rubi' ri Dios chupan ri ruch'ulef Galacia, tic'ulu' c'a ri saludos ri nintük-e yin, y ri saludos ri nquitük-e chuka' ri hermanos ri yec'o viq'uin. ³ Y ja ta c'a ri utzilñj sipanic ri nspaj-pe ri Dios y ri uxlanen ri petenük riq'uin ri Katata' Dios y ri Kajaf Jesucristo nc'uje' pa tak ivánima chi'ivonojel. ⁴ Roma ri Jesucristo xuya' c'a ri' richin xcamsüs roma ri kamac, richin quiri' nkurucol chuvüch ri itzel c'o chere' chuvüch ri ruch'ulef ri tiempo re'. Ronojel re' xbün ri Jesucristo koma roj, roma ja vi ri' ri rurayibül ri Katata' Dios. ⁵ Ri Katata' Dios ri c'o c'a ruk'ij richin jumul. Quiri' vi c'a.

Xaxe jun rubanic ri utzilñj tzij richin colonic

⁶ Yin jun vi xinna' tok xinvac'axaj que rix nijo' niya' yan can ri Dios y chuka' ri utzilñj tzij richin colonic. Rix xa jun vi chic chi na'oj ri nijo' nitz'om-e rutzeklebexic y nñj nyixbe-vi can chin ri Dios

ri xoyon ivichin richin xuya' ri utzilüj sipanic ri nspaj-pe ri Cristo pan ivi'. ⁷ Ri jun chic na'oj xa man riq'uin tuj ri Dios petenük-vi. Y ri vinük ri ye uc'uayon richin ri na'oj re' nyixquisatz riq'uin ri inojibül. Ncajo' c'a nquijül rubanic ri utzilüj rutzij ri Cristo ri nc'amon-pe colonic. ⁸ Y ri utzilüj tzij ri' xaxe jun rubanic. Y jari' ri katzijon can roj chive. Jac'a si c'o jun ri njalon rubanic ri utzilüj tzij richin colonic, nka-ka ri castigo ri Dios pari'. Y ri' stape' (aunque) ta jun ángel ri petenük chila' chicaj o ja roj mismo. ⁹ Cachi'el c'a ri kabin can chive, nincamulij-e rubixic chive vocomi: Si c'o jun ntzijon jun chic na'oj chive ri xa man junan tuj riq'uin ri utzilüj tzij richin colonic ri ic'ulun, ri ntzijon c'a ri na'oj ri' chive, nka-ka c'a ru-castigo ri Dios pari'.

¹⁰ ¿Y achique nibij rix? ¿Ninbün yin que utz nquitz'et coma ri vinük? ¿O ninbün que utz nquitz'et roma ri Dios? Yin man ninbün tuj que nquika' chiquivüch ri vinük. Roma si ta c'a quiri' ninbün, man ta xinoc rusamajel ri Cristo.

Ja ri Dios ri ruyo'on ri tzij richin ri colonic richin ri Pablo

¹¹ Hermanos, tivetamaj que ri utzilüj tzij richin colonic ri xintzijo chive, man runojibül tuj jun achi. ¹² Man riq'uin tuj jun vinük xinc'ul-vi-pe, ni man xtzijos tuj chuka' chuve roma jun vinük. Ja ri Jesucristo ri xk'alajrisan chinuvüch.

¹³ Y rix ivac'axan ri achique xenbanala' tok rubanun can, tok c'a nutzekleben na ri nquitakej ri nuvinak israelitas. Riq'uin ronojel vitzel nintz'om quicanoxic ri quitaken ri Dios. Y xinjo'

c'a que xeq'uis tñj. ¹⁴ Xinya-vi vánima chupan ri nquitakej ri nuvinak más que chiquivüch ch'aka vachibil ri junan xojq'uiy-pe quiq'uin. Rije' man ta xinquitz'om riq'uin ri xenbün. Roma yin xa xbe vánima riq'uin ri quibin can ri kaxquin-kamama' can. ¹⁵ Pero ri Dios, xa ja tok c'a man jani quinalüx, ja yan ri' tok xinrucha'. Pero xa c'are' can tok xinroyoj riq'uin ri utzilüj sipanic ri nspaj-pe ri Dios. ¹⁶ Y rurayibül vi c'a richin xuk'alajrisaj ri Jesucristo ri Ruc'ajol chinuvüch, roma ri Dios runojin-vi que nyentzijoj na ri Jesucristo cheque ri ch'aka chic vinük ri man ye nuvinak tñj. Y tok ri Dios ruk'alajrisan chic ri Jesucristo chinuvüch, man xinbe tñj riq'uin jun chic richin quiri' xinvetamaj más. ¹⁷ Ni man xinbe tñj chuka' quiq'uin ri apóstoles ri yec'o pa tinamit Jerusalén. Man riq'uin que rije' ye apóstoles pe q'uiy tiempo. Pero yin tok xinya' can ri tinamit Damasco, xa pa ruch'ulef Arabia xinbe-vi. Y tok xintzoliy c'a pe pan Arabia, pa tinamit Damasco xinc'uje-vi.

¹⁸ Y tok xec'o-e chic oxí' juna', jari' tok xinbe pa tinamit Jerusalén. Y xinc'uje-pe ca'i' semanas chiri' riq'uin ri apóstol Pedro. ¹⁹ Y chupan ri ca'i' semanas ri' man jun chic apóstol ri xinvetamaj ruvüch, xaxe ri Jacobo ri ruchak' ri Ajaf Jesucristo. ²⁰ Y chuvüch ri Dios ninbij chive que ri nintz'ibaj-e, ketzij vi. Man nintz'uc tñj e.

²¹ Y xinbec'uje' c'a pa ruch'ulef Siria y pa ruch'ulef Cilicia. ²² Man jun bey can ta xinc'uje' pa tak tinamit richin ri ruch'ulef Judea, y romari' ri hermanos ri nquimol-qui' pa rubi' ri Cristo, man quetaman tñj nuvüch. ²³ Xaxe c'a cac'axan chuvij,

que yin Pablo man jun chic itzel ninbün cheque ri quitaken ri Jesucristo, ri cachi'el xinbün tok rubanun can. Xa ninbij chic c'a cheque ri vinük que tiqitakej ri Jesucristo. Y man nurayibül tüt chic chuka' que nyeq'uis ri ye takeyon richin ri Jesucristo. Jari' ri cac'axan rije' pa nuvi'. ²⁴ Y ri hermanos ri', xquiya' c'a ruk'ij ri Dios roma xcac'axaj que jalatajnük chic ri nuc'aslen.

2

Chiquivüch ri ch'aka chic apóstoles ri Pablo chuka' jun apóstol

¹ Ye c'unük chic c'a cajlajuj (catorce) juna' chiri' tok yin xinbe jun bey chic pa tinamit Jerusalén, vachibilan-e ri hermano Bernabé. Y kac'uan c'a chuka' e ri hermano Tito. ² Y yin xinbe, roma ja ri Dios ri xk'alajrisan chinuvüch. Y xaxe ri hermanos ri c'o quik'ij y yin ri xkamol-ki'. Y xinbij c'a cheque ri achique rubanic ri utzilüt tziy richin colonic ri nintzijola' cheque ri vinük ri man ye israelitas tüt. Richin quiri' tiqubij c'a, si c'o nc'atzin-vi ri nusamaj o xa man jun vi nc'atzin. ³ Pero ri nusamaj xka-vi chiquivüch. Romari' ri hermano Tito ri benük viq'uin, man xban tüt chin que tiban ri circuncisión chin, ri jun retal ri xquibün ri israelitas pa ruch'ac'ul jun ac'ual ala' que ja richin ri tinamit ri Dios. Man riq'uin tüt que rija' xa man banun tüt vi ri circuncisión chin, roma rija' aj-Grecia. ⁴ Ri Tito man xban tüt vi ri circuncisión chin, stape' (aunque) yec'o ri xa man ye ketzij hermanos tüt ri xejo'on que xban ta. Rije' quiju'un-apu-qui' xaxe richin nquinachaj ri achique rubanic ri kac'aslen riq'uin ri Jesucristo,

ri Jun cha'on-pe y takon-pe roma ri Dios, si nkabün c'a ronojel ri nbij chupan ri ley rutz'iban can ri xuya' ri Dios richin ri Moisés, o man nkabün tñj chic. Rije' xcajo' que xojc'uje' ta chic chuxe' ri ley ri xuya' ri Dios richin ri Moisés. ⁵ Jac'a roj ni xa ta ba' xbij kánima que xekatakej tñj, richin quiri' ri ketzij rubanic ri utzilñj tzij richin colonic, ja ta ri' nc'uje' iviq'uin.

⁶ Y ri hermanos ri c'o quik'ij y c'o chuka' etam-abül quiq'uin, man jun chic c'a rubanic ri rutzij ri Dios ri xquic'ut ta pe chinuvüch. Y yin, man ja tñj c'a si c'o quik'ij o manak quik'ij ri xintz'et. Roma ri Dios man ja tñj ri jaru' títzu'un jun vinük ri nutz'et. ⁷ Pa ruq'uexel c'a que ri hermanos xinquitijoj ta pe más pari' ri rutzij ri Dios, xa jari' tok xquinabej que chuve yin chilaben richin nintzizoj ri utzilñj tzij richin colonic cheque ri vinük ri man ye israelitas tñj y man banun tñj ri circuncisión cheque. Cachi'el tok xchilabex chin ri Pedro que querutzizoj ri utzilñj tzij richin colonic cheque ri kavinak israelitas y banun ri circuncisión cheque.

⁸ Y ja ri Dios nto'on richin ri Pedro chupan ri samaj ri richin vi jun apóstol, ri chiquicojol ri kavinak israelitas y banun circuncisión cheque. Y quiri' chuka' yin ja Dios ri' ri nto'on vichin, richin nquisamñj chiquicojol ri vinük ri man ye israelitas tñj y man banun tñj ri circuncisión cheque.

⁹ Romari' tok ri Jacobo, ri Pedro y ri Juan, ri ye más nimalñj chiquicojol ri hermanos, xquitz'om kak'a' riq'uin ri Bernabé, roma xquinabej ri achique chi samaj ri chilaben-pe chuve yin, que ri Dios ruyo'on-vi-pe ri utzilñj sipanic ri nspaj-pe rija' chuve. Y xquitz'om c'a kak'a' richin quiri'

nk'alajin que kachibil ki' chupan ri samaj. Xaxe c'a roj nkubesamüj chiquicojol ri vinük ri man ye israelitas tuj, y rije' richin nyebesamüj chiquicojol ri kavinak israelitas y banun ri circuncisión cheque, ri jun retal ri xquibün ri israelitas pa ruch'ac'ul jun ac'ual ala' que ja richin ri tinamit ri Dios. ¹⁰ Xaxe c'a xquichilabej cheke que tika-pe c'a chikac'u'x ri manak quichajin. Y jari' ri nintij nuk'ij ninbün.

Tok ri Pablo xbij chin ri Pedro que man utz tuj ri nbün

¹¹ Y tok ri Pedro xbec'uje' c'a pa tinamit Antioquía, xintz'amon tzij chirij, roma man choj tuj ri ntajin chubanic chiri'. ¹² Roma pa nabey, nva-vi quiq'uin ri hermanos ri man ye israelitas tuj. Jac'a tok yec'o achi'a' ri ye rachibil ri Jacobo xe'apon riq'uin, jari' tok ri Pedro xutz'om man xbeva' tuj chic quiq'uin ri hermanos man ye israelitas tuj, roma xuxbij-ri' chiquivüch ri achi'a' ri xe'apon riq'uin, roma ja rije' ri nyebin que nc'atzinej que tiban ri circuncisión cheque ri hermanos, stape' (aunque) man ye israelitas tuj. ¹³ Y ri hermanos ri ye israelitas vi y chiri' pan Antioquía yec'o-vi, junan xquibün riq'uin ri Pedro. Man xe'apon tuj chic c'a quiq'uin ri hermanos man ye israelitas tuj. Xk'alajin c'a que ca'i' quipaluj, roma pa nabey xa ye c'unük-vi. Y hasta ri Bernabé xbün cachi'el ri xquibün rije'. ¹⁴ Y roma c'a ri nquibün xa man ruc'uan tuj ri' riq'uin ri ketzij ri nbij chupan ri utziluj tzij richin colonic, chiquivüch c'a conojel xinbij chin ri Pedro: Rat rat israelita, pero xa cachi'el ri nquibün ri vinük man ye israelitas tuj,

xa quiri' ri nabün. ¿Ncatiquer ta nabün cheque ri man ye israelitas tñj que nquibün ri nbij chupan ri ley ri xuya' ri Dios richin ri Moisés, tok rat man nac'ut tñj avi' chiquivüch pan ac'aslen que rat israelita?

Xaxe roma ri Jesucristo c'o colonic

¹⁵ Roj ri roj israelitas pe pa kalaxic, nkabij que man roj aj-maqui' tñj cachi'el ri vinük ri man ye israelitas tñj. ¹⁶ Pero ketaman que man jun c'a cheke roj ri rubanun tñj ronojel ri nbij ri ley ri xuya' ri Dios richin ri Moisés, y romari' man ja tñj ri ley ri' ri nbanun cheque ri vinük que man jun quimac nutz'et ri Dios. Roma ri nc'atzin ja ri nquitakej ri Jesucristo richin que man jun quimac nk'alajin chuvüch ri Dios. Romari' tok man xe tñj ri man ye israelitas tñj ri ye takeyon ri Jesucristo, xa quiri' chuka' roj israelitas, katakaen richin que man jun kamac nk'alajin chuvüch ri Dios. Man kayo'on tñj chic kánima riq'uín ri nbij chupan ri ley ri xuya' ri Dios richin ri Moisés, roma man ja tñj ri ley ri' ri nbanun cheke que man jun kamac nk'alajin chuvüch ri Dios.

¹⁷ Xkatakej c'a ri Cristo, roma xkajo' que man jun kamac nk'alajin chuvüch ri Dios. Y roma xkatakej, xk'alajin c'a que roj roj aj-maqui'. Y man nkutiquer tñj nkabij que c'a ja ri Cristo xbanun-ka que roj aj-maqui'. Man quiri' tñj. ¹⁸ Y si ta nyentz'ama' chic pe ruya'ic ruk'ij ri ley ri xuya' ri Dios richin ri Moisés, ri nuyo'on chic can, nbek'alajin c'a pe ri' que man utz tñj ri xinbün tok xinya' can. ¹⁹ Y roma xk'ax chuve que man

nquitiquer tñj nquicolotñj riq'uin ri ley ri', romari' man xinya' tñj chic vñima riq'uin. Quiri' nuc'ulachin tok xinvil ri c'aslen riq'uin ri Dios. ²⁰ Y tok ri Cristo xcamsüs chuvüch ri cruz, yin cachi'el ta xincom riq'uin. Y romari' ri nuc'aslen ri c'o vocomi, man vichin tñj yin, xa richin ri Cristo ri c'o pa vñima. Y ronojel c'a ri ninbün-e chuvüch ri ruch'ulef, ninbün c'a roma riq'uin ri Cristo ri Ruc'ajol ri Dios nuya-vi vñima, ri Cristo ri xjo'on vichin, y ri xuya' chuka' ri' richin xcamsüs voma. ²¹ Yin man ninbün tñj c'a que ninvetzelaj ri utzilñj sipanic ri nspaj-pe ri Dios. Pero si ta riq'uin ri ley ri xuya' ri Dios richin ri Moisés man jun kamac nk'alajin chuvüch ri Dios, ri Cristo man jun vi tñj xc'atzin que xcom.

3

Ri ley man nuc'ün tñj pe colonic

¹ Hermanos aj-Galacia, ¿achique c'a roma man nyixnucun tñj jabel? ¿Y achique c'a roma tok rix ch'acatajnük y man nitakej tñj ri ketzij? Tok xa kabin can chive que ri Jesucristo xcom chuvüch ri cruz koma. ² Y ninjo' ninc'utuj chive: ¿Ja ri nbij ri ley ri xuya' ri Dios richin ri Moisés ri xitakej richin que xoc ri Lok'olñj Espíritu iviq'uin? Man quiri' tñj. Xa roma ri xitakej ri Jesucristo ri xkatzijoj chive. ³ ¿Nc'o c'a ruvi' ri man nyixnucun tñj? Roma tok xitakej ri Jesucristo, ri Lok'olñj Espíritu xbün chive que man jun imac xk'alajin chuvüch ri Dios. Pero vocomi rix man nijo' tñj chic que ja ri Lok'olñj Espíritu ri nbanun chive que man jun imac nk'alajin chuvüch ri Dios, xa iyon rix

nijo' nicanoj. ⁴ ¿Man jun vi xc'atzin ri xibün tok xitakej ri Jesucristo? Yin ninrayij que man ta quiri'. ⁵ Ri Dios ruyo'on ri Lok'olüj Espíritu chive y nbanala' milagros chi'icojol. ¿Achique roma nbün quiri'? ¿Roma ja ri nbij ri ley ri xuya' ri Dios richin ri Moisés ri xitakej? Man quiri' tñj. Xaxe roma xitakej ri Jesucristo ri xkatzijoj chive.

⁶ Cachi'el xbün ri Abraham, ri kaxquin-kamama' can roj israelitas ojer can tiempo. Rija' xutakej-vi ri Dios, y romari' ri Dios xbün chin que man jun rumac xutz'et rija'. ⁷ Tivetamaj c'a chuka' que conojel ri nyetaken richin ri Dios, nye'oc c'a ralc'ual ri Abraham. ⁸ Y chupan ri rutzij ri Dios ri tz'iban ojer can, nk'alajin c'a que ri Dios nbün-vi c'a cheque ri vinük ri man ye israelitas tñj, que man jun quimac nk'alajin chuvüch rija', si nquitakej. Y ri utzilüj tzij richin colonic, chin ri Abraham xtzijos-vi. Y xbix c'a chin: Avoma c'a rat, ri vinük chi ronojel ruch'ulef nguic'ul-vi ri utz, xbij ri Dios chin ri Abraham. ⁹ Y cachi'el ri Abraham xuc'ul ri utz roma xutakej ri Dios, quiri' c'a chuka' conojel ri nyetaken richin ri Dios, nguic'ul chuka' ri utz.

¹⁰ Pero si ncajo' nguicol-qui' roma ri ley ri xuya' ri Dios richin ri Moisés, y xa man nyetiquer tñj nguibün ronojel ri nbij ri ley ri', xa nka-vi c'a ri ru-castigo pa quivi'. Cachi'el ri nbij chupan ri rutzij ri Dios ri tz'iban can: Ri man nbanun tñj c'a ronojel ri nbij chupan ri vuj richin ri ru-ley ri xuya' richin ri Moisés, nka-ka ri ru-castigo pari'. Quere' c'a ri nbij chupan ri tz'iban can. ¹¹ K'alüj vi c'a que man jun vinük ri ntiquer ta que riq'uin ri ley ri' man jun tñj rumac nk'alajin chuvüch ri Dios. Roma

chupan ri rutzij ri Dios ri tz'iban can, nbij: Ri vinük ri choj chic quic'aslen, nc'uje-vi quic'aslen riq'uin ri Dios roma quiyo'on cánima riq'uin. Quiri' nbij ri tz'iban can. ¹² Ri ruc'uaxic ri ley, man cachi'el tñj ri natakej ri Dios. Man quiri' tñj. Xa nc'atzinej que nabün ronojel ri nbij chupan. Y romari' tok ri ley nbij: Ri nbanun ronojel ri nbij ri ley re', nril-vi ruc'aslen riq'uin ri Dios. Quiri' ri nbij ri ley.

¹³ Y ketzij vi que ri man ntiquer tñj nbün ronojel ri nbij ri ley, nka-ka ri castigo pari'. Pero ri Cristo xojrucol chuvüch ri castigo ri', tok xcom chuvüch ri cruz, roma pari' rija' xka-vi ri castigo ri xa pa kavi' ta roj c'uluman que xka-ka ta vi. K'alüj vi que xka-ka ri castigo pari', roma ri rutzij ri Dios ri tz'iban can, nbij: Achique na c'a ri ntzekebüs chuvüch jun che', nk'alajin c'a que kajnük ri castigo pari'. Quiri' nbij chupan ri tz'iban can. ¹⁴ Pero ri Jesucristo, ri Jun cha'on-pe y takon-pe roma ri Dios xcom koma konojel roj vinük, richin quiri' hasta ri vinük ri man ye israelitas tñj nquic'ul chuka' ri utz ri xbij ri Dios ojer can chin ri Abraham. Y ri Jesucristo xcom chuka' richin quiri' konojel ri nkataken richin, nc'uje' ri Lok'olüj Espíritu kiq'uin, roma quiri' chuka' rubin can ri Dios.

Ri ley ri xuya' ri Dios richin ri Moisés man ntiquer tñj c'a nujül ri ru-trato ri Dios riq'uin ri Abraham

¹⁵ Y tivac'axaj na pe', hermanos. Xaxe na pe' ri chikacojol ka roj tok c'o jun trato nban, tok c'achojnük chic can, man jun c'a ntiquer niyohon ri trato ri'. Ni man jun c'a chuka' ntiquer tñj ntz'akatisan chic ba' chin. ¹⁶ Tok ri Dios xbün

ri trato riq'uin ri Abraham ojer can, xusuj c'a ri utz chin rija' y chin ri ruxquin-rumam can ri Abraham ri nc'uje'. Ri Dios man xch'o tñj pari' ri ye q'uiy ruxquin-rumam can ri Abraham ri nyec'uje'. Man quiri' tñj. Xaxe pari' jun xch'o-vi. Y ri jun ruxquin-rumam can ri Abraham ri', ja ri Cristo. ¹⁷ Y ninjo' ninchojmirsaj chivüch ri rubanic ronojel re'. Pa nabey ri Dios rubanun jun trato riq'uin ri Abraham. Y tok ye c'unük chic cuatro cientos treinta juna' c'achojnük can ri trato riq'uin ri Abraham, ri Dios xuya' ri ley chin ri Moisés. Pero roma c'a ri Dios rubanun-vi chic ri trato riq'uin ri Abraham nabey, ri ley ri xuya' ri Dios richin ri Moisés man xuyoj tñj ri trato ri rubanun pa nabey. Ni ri ley man xtiquer tñj chuka' xbün que ri Dios man ta xuya' ri utz ri rusujun can chin ri Abraham. Y ri utz ri Dios ri' ja ri Cristo. ¹⁸ Si ta roma ri ley ri xuya' ri Dios richin ri Moisés nivichinaj ri utz ri Dios, man ta jun vi nc'atzin ri xusuj ri Dios chin ri Abraham. Pero xa man quiri' tñj. Roma ri Abraham xuc'ul ri utz rusujun ri Dios, pero man riq'uin tñj ri ley. Rija' xuc'ul ri utz ri Dios roma ja ri Dios ri xsujun chin.

¹⁹ ¿Y achique nc'atzin-vi ri ley ri xuya' ri Dios richin ri Moisés? Ri Dios xuya' ri ley ri' richin quek'alajin-pe ri mac, y richin nucusüs tok c'a oyoben na ri ruxquin-rumam can ri Abraham, ri ruxquin-rumam can ri sujun ri utz chin roma ri Dios. Y tok ri Dios xuya' ri ley, xerucusaj k'asüy tak tzij. Nabey, xuya' cheque ángeles, y ri ángeles re' xquiya' chin ri Moisés. Y pa ruq'uisbül ri Moisés xuya' cheque ri vinük. ²⁰ Y tok c'o c'a jun k'asüy-tzij, nk'alajin-vi que man ruyon tñj c'o, roma c'o-

vi chuka' ri nbin ri tzij y ri nc'ulun. Pero ri Dios ruyon tok xusuj ri utz chin ri Abraham.

Ri achique xc'atzin-vi ri ley ri ruyo'on chin ri Moisés

²¹ ¿Y nkutiquer nkabij que ri Dios xuya' ri ley richin xuyoj ta ri rusujun can? Man quiri' tñj. Pero si ta ri ley xtiquer ta xuya' c'aslen, ja ta ri ley ri' ri nbanun cheke que man jun kamac nk'alajin chuvüch ri Dios. ²² Pero ri rutzij ri Dios ri tz'iban can, nbij cheke que konojel roj vinük roj aj-maqui' vi, richin quiri' tiketamaj que ncatzinej que nkatakej ri Jesucristo, y nkac'ul ri rusujun can ri Dios. Y nkac'ul xa xe roma ri nkaya' kánima riq'uín ri Jesucristo.

²³ Y tok c'a man jani tipu'u ri Jesucristo, cachi'el ta pa jun cárcel xojc'uje-vi, roma xojc'uje' pa ruk'a' ri ley ri xuya' ri Dios richin ri Moisés. Y chiri' xojtz'ape-vi, koyoben richin nbek'alajin-pe ri nc'atzinej que nkatakej. ²⁴ Ri ley ri xuya' ri Dios richin ri Moisés xa chajiy c'a kichin, y xojruc'uaj c'a riq'uín ri Cristo richin xkatakej richin quiri' man jun kamac xutz'et ri Dios. ²⁵ Jac'a vocomi ri ley ri xuya' ri Dios richin ri Moisés man nc'atzin tñj chic richin nkuruchajij. Roma vocomi xpu'u yan ri Jesucristo, y ja rija' ri nkatakej.

²⁶ Y konojel roj y rix ri katakaen chic ri Jesucristo, roj ralc'ual chic c'a ri Dios. ²⁷ Ri xojban bautizar pa rubi' ri Cristo, xa jun xkabün riq'uín rija'. Nk'alajin-vi-pe ri Cristo pa tak kac'aslen xa cachi'el xujül ri katziek. ²⁸ Konojel c'a ri katakaen ri Jesucristo, ri Jun cha'on-pe y takon-pe roma ri Dios, junan chic kavüch. Junan kavüch si israelita,

o man israelita tñj, si ximil pa samaj, o si libre, si achi o ixok. Junan c'a kavũch konojel, roma jun chic kabanun riq'uin ri Jesucristo, ri Jun cha'on-pe y takon-pe roma ri Dios. ²⁹ Y roma roj richin chic ri Cristo, xojoc ruxquin-rumam can ri Abraham. Y nkichinaj c'a chuka' ri utz ri xusuj ri Dios chin ri Abraham ri ojer can.

4

¹ Y ninjo' c'a chuka' ninchojmirsaj más chivũch ri rubanic ronojel re'. C'o ta jun ac'ual ri c'o nrichinaj can chin ri rutata'. Pero tok ri ac'ual re' xa c'a co'ol, man jani c'a nuc'ul tñj can ri ru-herencia. Y stape' (aunque) ja rija' rajaf ronojel, junan ri ac'ual re' riq'uin jun rusamajel ri rutata' roma c'a man jun c'o tñj pa ruk'a'. ² Ri ac'ual c'a re' ye canon chajiy y yuk'uy richin. Y ri ac'ual nc'atzinej que nc'uje' chuxe' ri quitzij ri vinũk ri', hasta tok c'a napon na ri k'ij ri bin roma ri rutata'. ³ Y quiri' c'a kabanun roj tok rubanun can, roj cachi'el c'a ri ac'ual ri man jani tuc'ul ri herencia. Xaxe chic c'a roj xojc'uje' chuxe' tzij ri man ye tz'akũt tñj y man nquic'ũn tñj pe colonic. ⁴ Y tok xka-pe c'a ri k'ij ri cha'on roma ri Dios, ri Dios xutũk c'a pe ri Ruc'ajol. Y xka-pe xalũx riq'uin jun ixok. Y roma chikacojol roj israelitas xalũx-vi ri Ruc'ajol ri Dios, xc'uje' c'a chuxe' ri ley ri xuya' ri Dios richin ri Moisés. ⁵ Y rija' xpu'u richin nkurucol roj ri rojc'o chuxe' ri ley ri', y richin chuka' nbũn que nkujoc ralc'ual ri Dios.

⁶ Y roma ri roj ralc'ual chic ri Dios, ri Dios xutũk c'a pe ri Lok'olũj Espĩritu pa tak kánima, ri nk'alajrisan ri Ruc'ajol ri Dios chikavũch. Y ri

Lok'olüj Espíritu ri c'o pa tak kánima, Nata', nbij c'a chin ri Dios. ⁷ Riq'uin c'a ri' nk'alajin que roj ralc'ual vi ri Dios, roma xkatakej ri Cristo. Man rojc'o tuj chic chuxe' ri ley ri xuya' ri Dios richin ri Moisés. Y roma roj ralc'ual chic ri Dios, nkichinaj ri herencia ri nuya' rija'.

Ri Pablo nuna' k'oxon coma ri hermanos aj-Galacia

⁸ Y tok rubanun can, tok c'a man jani tivetamaj ruvüch ri Dios, rix xa ja ri ch'aka chic dios (tioX) ri xe'isamajij, ri xa man ye dios tuj. ⁹ Jac'a vocomi, ivetaman chic ruvüch ri Dios. O más utz ninbij que ja ri Dios ri etamayon chic ivüch rix. ¿Achique c'a roma tok rix nijo' nisamajij jun tzij ri xa man tz'aküt tuj, ni manak ruchuk'a' y man nuc'ün tuj pe colonic chive? ¹⁰ Yec'o k'ij ri nye'ichajila', y chuka' nye'ichajila' ic', juna' y ch'aka chic nimak'ij. ¹¹ Yin ninna' c'a que ri samaj xinbün iviq'uin, cachi'el xa man jun vi xc'atzin.

¹² Yin xinél yan pe chuxe' rutzij ri ley ri xuya' ri Dios richin ri Moisés, y rix man jun bey vi xixc'uje' chuxe' rutzij ri ley ri'. Roma c'a ri' hermanos, ninc'utuj favor chive que tibana' cachi'el yin y man quixoc chuxe' ri ley ri'. Tok xinc'uje' iviq'uin, rix galán utz xibün viq'uin. ¹³ Y jabel c'a ivetaman, que pa nabey xa roma jun nuyabil tok xinc'uje' iviq'uin y xintzijo' ri utzilüj tzij richin colonic chive. ¹⁴ Y juis q'uiy ri p'okonül xinc'usaj roma ri yabil. Man riq'uin ri yin yava', rix man itzel tuj xintzet, ni man xinivetzela' tuj. Xa jabel nuc'ulic xibün. Cachi'el xa ta jun ángel richin ri Dios, o

cachi'el xa ta ja yin ri Jesucristo, ri Jun cha'on-pe y takon-pe roma ri Dios, ri xibün chuve tok xinic'ul. ¹⁵ Y chiri' juis xquicot ri ivánima voma yin. Xk'alajin c'a que juis xinijo'. Y yin vetaman que si ta c'o nc'atzin-vi richin xivelesaj ta ri runak' tak ivüch, richin ta xiya' chuve yin, xibün ta. ¿Pero ape' c'a xbe-vi ri quicot ri xc'uje' iviq'uin pa nabey? ¹⁶ ¿Ninuc rix que yin itzel ninna' chive y romari' tok xinbij ri ketzij chive? Man quiri' tütj.

¹⁷ Y yec'o c'a ca'i-oxi' achi'a' chi'icojol ri q'uiy utz nquibün chive, pero quiri' nquibün iviq'uin roma ncajo' que nye'itzeklebej y rix niya' ta can ri Jesucristo, ri katzijon can roj chive. Y xe ta rije' ri nye'itzeklebej ta ncajo'. ¹⁸ Y si c'o c'a jun ri nbanun utz chive roma nrajo' que utz ta nyixc'uje', galán jabel, y chi jumul ta nbün quiri' y man ta xaxe tok yinc'o iviq'uin. ¹⁹ Rix ri cachi'el valc'ual nubanun chive, juis c'a k'oxon ri niya' jun bey chic pa vánima, roma man jani iyo'on tütj ivánima riq'uin ri Cristo. Y ri k'oxon ri niya' pa vánima, juis nim, xa cachi'el ri k'oxon ri nuc'usaj jun ixok tok nralaj jun ac'ual. Y ri k'oxon ri ninna' vocomi ivoma rix, nq'uis-e, c'a ja tok nquiya' na ivánima, rix riq'uin ri Cristo. ²⁰ Y yin juis c'a ninjo' que yinc'o ta apu iviq'uin vocomi, richin quiri' nquich'o ta iviq'uin, y man ta xaxe nintz'ibaj-e. Man ninnucutütj tütj c'a chinuvüch achique c'uluman ninbün iviq'uin.

Ri ejemplo pa quivi' ri ca'i' ixoki' quibini'an Agar y Sara

²¹ Y tibij c'a chuve rix ri nijo' nyixc'uje' chuxe' ri ley ri xuya' ri Dios richin ri Moisés: ¿Achique c'a roma tok man k'axnük tütj chive ronojel ri nbij

ri ley ri'? ²² Roma ri Moisés rutz'iban can que ri Abraham xec'uje' ca'i' ruc'ajol. Ri jun ruc'ajol xc'uje' riq'uin ri raj-ic' ri lok'on, ri ximil-vi pa samaj. Y ri jun chic ruc'ajol, xc'uje' riq'uin ri rix-jayil ri libre vi. ²³ Ri ruc'ajol ri Abraham ri xc'uje' riq'uin ri raj-ic', xalüx cachi'el nye'alüx conojel ac'uala'. Jac'a ri jun chic ruc'ajol ri Abraham ri xc'uje' riq'uin ri rixjayil, xalüx roma ja ri Dios ri xsujun-pe chin. ²⁴ Ri tzij re' jun ejemplo. Roma ri ca'i' ixoki' re', cachi'el ca'i' tratos ri xebanatüj. Ri ixok Agar, ri raj-ic' ri Abraham, cachi'el ri trato ri xban pari' ri nimalüj juyu' rubini'an Sinaí. Y conojel c'a ri xe'oc chupan ri trato re', jari' ri xe'oc chuxe' ri ley ri xuya' ri Dios richin ri Moisés. Pero xa man ye libre tüt, xa cachi'el ye ximil pa samaj. ²⁵ Ri ixok Agar, cachi'el vi ri trato ri xban pari' ri juyu' rubini'an Sinaí, pa ruch'udef Arabia. Ri Agar man libre tüt. Y ri nuvinak israelitas ri ye aj-Jerusalén, ri yec'o-vi chuxe' ri ley ri xuya' ri Dios richin ri Moisés, rije' chuka' man ye libre tüt. Xa ye cachi'el ri ixok Agar ri aj-ic' lok'on. ²⁶ Pero man ye quiri' tüt ri ye aj pa tinamit Jerusalén, ri richin chila' chicaj. Ri vinük ri richin ri tinamit ri' ye libre. Y ja roj ri katakaen chic ri Jesucristo roj richin ri tinamit ri'. ²⁷ Y pari' c'a ri tinamit ri' nch'o-vi ri rutzij ri Dios ri tz'iban can, tok nbij:

Rat ri man rat alanel tüt, man cabison roma ri man jun aval.

Xa riq'uin c'a ronojel avuchuk'a' tabij tzij roma quicot, stape' (aunque) man jun bey alaxnük tüt jun aval.

Y stape' (aunque) rat xamalix can roma ri avachijil, yin ninbün c'a chave que más ye q'uiy

aval ri nyec'uje',
que chuvüch ri nyec'uje' riq'uin ri ixok ri c'o-vi ri
rachijil riq'uin.

²⁸ Hermanos, ri Dios riq'uin c'a ri utzilüj sipanic
ri nspaj-pe ri Dios xusuj cheke que nkujoc ralc'ual.
Junan c'a riq'uin ri xbanatüj riq'uin ri Isaac. Roma
ri Isaac jari' ri ralc'ual ri Abraham ri sujun-pe
chin roma ri utzilüj sipanic ri nspaj-pe ri Dios.

²⁹ Ri ral ri Agar man sujun tüj pe roma ri Dios.
Xa xalüx cachi'el nye'alüx achique na ac'uala'. Y
ri ral ri aj-ic' re' xretzelaj c'a ri Isaac. Y quiri'
c'a chuka' nc'ulachitüj vocomi. Roj ri roj ralc'ual
chic ri Dios roma c'o ri Lok'olüj Espíritu kiq'uin,
nkujetzelüs coma ri vinük ri manak ri Lok'olüj
Espíritu quiq'uin. ³⁰ Y ri rutzij ri Dios ri tz'iban
can, nbij que telesüs-e ri aj-ic' lok'on, rachibilan
ri ral. Roma ri ral ri aj-ic' ri', man jun nrichinaj
tüj chin ri rubeyomal ri rutata'. Xaxe vi ri ral ri
rixjayil libre ri c'uluman nchinan ri rubeyomal ri
rutata'. Quiri' nbij ri tz'iban can. ³¹ Hermanos, roj
ri kataken chic ri Jesucristo, roj cachi'el ri ral ri
rixjayil libre ri Abraham, y roj libre chic. Man chic
c'a roj cachi'el ta ri ral ri aj-ic', y man chic roj ximil
ta pa samaj.

5

Tiya' c'a ivánima riq'uin ri Cristo

¹ Rurayibül vi c'a ri Cristo que roj libre. Romari'
tok xojrucol chuvüch ri ley ri xuya' ri Dios richin ri
Moisés. Y roma c'a ri', tiya' ivánima riq'uin ri Cristo.
Y man tixim-ivi' c'a jun bey chic.

² Y tivac'axaj na pe'. Yin ri Pablo ninbij c'a chive: Si niya' k'ij que nban ri circuncisión chive, ri jun retal ri nquibün ri israelitas pa ruch'ac'ul jun ac'ual ala' que ja richin ri tinamit ri Dios, roma ninuc que riq'uin quiri' nyixcolotüj, ri xbün c'a ri Cristo koma, man jun c'a rakalen chivüch ri'. ³ Y ninbij c'a jun bey chic cheque ri achi'a' ri nquiya' k'ij que nban ri circuncisión cheque: Si nquiya' k'ij richin nban ri circuncisión cheque, nc'atzin que nquibün ronojel ri nbij chupan ri ley ri xuya' ri Dios richin ri Moisés, richin quiri' nyecolotüj. ⁴ Y rix ri nijo' c'a que riq'uin ri ley ri' man jun imac nk'alajin chuvüch ri Dios, xixjachatüj yan pe riq'uin ri Cristo, y chuka' iyo'on chic can ri utzilüj sipanic ri nspaj-pe ri Dios. ⁵ Pero roj koyoben que man jun kamac nk'alajin chuvüch ri Dios, roma ja ri Cristo ri kataken y roma chuka' c'o ri Lok'olüj Espíritu pa tak kánima. ⁶ Roj c'a ri roj richin chic ri Jesucristo, ri Jun cha'on-pe y takon-pe roma ri Dios, man jun nbün cheke si nban ri circuncisión cheke, o man nban tütj. Ri nc'atzin ja ri kataken ri Cristo, y roma kataken nkujo'on conojel vinük.

⁷ Pa nabey, choj vi rix benük. ¿Jac'a vocomi, achique c'a xbanun chive que man nijo' tütj chic nitakej ri ketzij? ⁸ Roma ri Dios xixroyoj richin xitakej. Pero ri nbix chive rix, k'alütj que man riq'uin tütj ri Dios petenük-vi. ⁹ Y cachi'el c'a ri nbün ri levadura, xa riq'uin nic' nquiya' chupan ri qui'en chin nban caxlan vüy, ntoc chupan ri qui'en. Quiri' c'a chuka' nquibün ri tzij ri xa man ye utz tütj, xa riq'uin jun, nutz'om nyerujül conojel. ¹⁰ Y yin nuyo'on vánima riq'uin ri Ajaf Jesucristo,

que rix xe vi ri ketzij ri nitakej. Y ri vinük c'a ri njalon ri rutzij ri Dios chivüch, nc'atzinej c'a que nka-ka castigo pari'. Y achique na ta c'a ri vinük ri'.

¹¹ Y yin hermanos, si ta c'a nintzijo que ri circuncisión utz, ri nuvinak israelitas man ta yinquetzelaj, y man ta itzel chuka' ncac'axaj tok nintzijo que ri Cristo xcom chuvüch ri cruz. ¹² Juis c'a ninrayij que nyec'amon ta e ri vinük ri nyejalon ri rutzij ri Dios chivüch.

¹³ Roma rix hermanos ja ri Dios ri xixoyon, richin xixrucol-pe chuxe' ri ley ri xuya' ri Dios richin ri Moisés. Rix libre chic c'a. Rix libre vi richin nijola' y nitola-ivi'. Pero man roma tuj c'a ri rix libre chic, roma ta ri' ja ta ri nirayij rix ja ta ri' ri nibün. ¹⁴ Roma chupan ri ley ri xuya' ri Dios richin ri Moisés, nbij: Cachi'el c'a ri najo-ka-avi' rat, quiri' c'a chuka' que'ajo' ri ch'aka chic. Quiri' nbij ri tz'iban can. Y xa riq'uin c'a nabün ri nbij ri jun tzij re', xabün yan c'a ronojel ri nbij chupan ri ley ri'. ¹⁵ Man tisocola-ivi' riq'uin pokon tak tzij, roma si quiri' nibün, nitz'et na pe' que nyixq'uis.

Tiya' k'ij chin ri Lok'olüj Espíritu que ja rija' nuc'uan ivichin y man tibün ri nirayij rix

¹⁶ Y ninbij c'a chuka' chive: Tiya' k'ij que ja ri Lok'olüj Espíritu nuc'uan ivichin, y man tibün ri nirayij rix. ¹⁷ Roma si xa ja ri irayibül rix ri nijo' nibün, re' man utz tuj c'a nuna' chin ri nrajo' ri Lok'olüj Espíritu. Y ri Lok'olüj Espíritu man nrajo' tuj que ja ri itzel tak rayibül nc'uje' pa tak ic'aslen. Man jun bey c'a nquic'uaj tuj qui'. Romari' man ta nyixtiquer nibün ri nirayij rix. ¹⁸ Y si niya' c'a

k'ij chin ri Lok'olüj Espíritu que ja rija' ri nyuk'un ivichin chupan ri ic'aslen, man rixc'o tuj c'a chuxe' ri ley ri xuya' ri Dios richin ri Moisés.

¹⁹ Y chanin vi c'a nk'alajin ri vinük ri nbanun ri nurayij rija', roma ri nbanun ruyon cachi'el re': Ri vinük ri ye c'ulan y ri man ye c'ulan tuj nquicanola-qui' richin nyemacun. Juis vi itzel nquibün y man jun quiq'uix tok nyequibanala'.

²⁰ Ri nquiyala' quik'ij dios (tiox) ri xa man ye ketzij tuj. Ri nquibün itz. Ri nye'etzelan-qui'. Ri nyebanun oyoval. Ri itzel nquina' cheque ri ch'aka chic roma utz yec'o. Ri nyebanun que xaxe ta rije' c'o utz nquic'ün can chin ronojel. Ri nquijachala-qui' roma ri quinojibül. Ri nka' chiquivüch ri tijonic ri xa man ye ketzij tuj. ²¹ Itzel nyequitz'et ri ch'aka chic roma c'o ri quichajin. Ri nyecamsan. Ri nyek'abür. Ri nyebanun man utziluj tak nimak'ij tuj. Y ri nyequibanala' chuka' ch'aka chic quivüch itzel cachi'el ri quiri'. Y nubin c'a chive jun bey chic, y nincamulij rubixic chive, que ri vinük ri nyebanun itzel cachi'el ri quiri', man nye'ichinan tuj quiq'uin ri yec'o pa ruk'a' ri Dios.

²² Y si niya' c'a k'ij que ja ri Lok'olüj Espíritu nuc'uan ivichin chupan ri ic'aslen, ri ic'aslen quere' nic'uaj: nyixjo'on, nquicot ri ivánima, nc'uje' uxlanen pan ivánima, nyixcoch'on, nim ri ivánima, nibanala' utz cheque ri ch'aka chic, nquiya' ivánima', ²³ nic'uaj jun c'aslen ch'uch'uj, nik'il-ivi' chuvüch ri mac. Y si jun c'aslen quiri' ri nic'uaj, ri ley ri xuya' ri Dios richin ri Moisés man jun nbün chive. ²⁴ Y konojel c'a ri roj richin chic ri Cristo, cachi'el ta xobjajix riq'uin rija' chuvüch ri

cruz, richin roj xekaya' can ri itzel tak rayinic. ²⁵ Ja ri Lok'olüj Espíritu ri yo'on ri c'ac'a' kac'aslen. Romari' tikaya' c'a k'ij que ja rija' ri nuc'uan kichin.

²⁶ Man c'a tikanimirsaj-ki'. Richin quiri' man tikabün c'a cheque ri ch'aka chic que nyecatüj-pe chikij. Ni man itzel c'a chuka' quekatz'et ri ch'aka chic roma ri utz yec'o.

6

Tikatola-ki'

¹ Hermanos, nquich'o c'a chive rix ri ic'uan jun c'aslen cachi'el ri nrajo' ri Lok'olüj Espíritu. Si c'o c'a jun hermano ri nka' pa mac, riq'uin c'a ch'uch'ujil que'iyaca-pe, richin quiri' ntzoli-pe ruc'u'x riq'uin ri Dios. Y rix tibana' c'a cuenta ivi'. Man xa tic'ulachij chuka' quiri' que c'o ri tibanun chive que nyixtzak pa mac. ² Y si c'o c'a nkac'ulachila', y nkana' que cachi'el jun aka'n ri c'o chikij, tikatola' c'a ki' chuc'uaxic ri aka'n re'. Y riq'uin ri', nkabün-vi c'a ri nbij ri ley richin ri Cristo.

³ Pero si c'o c'a jun ri nunuc que c'o ruk'ij, y rija' xa manak ruk'ij, xa ruyon c'a nuch'üc-kari'. ⁴ Chikajujunal tikatz'et-ka ri nkubanun, k'alüj ri' si utz o xa man utz tñj. Y si ri nkubanun utz vi, c'uluman c'a que nquicot ri kánima. Y man nc'atzin tñj na nkatz'et ri nbanun jun chic hermano. ⁵ Roma chikajujunal nc'atzinej c'a que nyekakaj ri kaka'n.

⁶ Y rix ri nyixtijox chin ri rutzij ri Dios, que'ito' c'a ri nyetijon ivichin riq'uin ronojel ri nc'atzin cheque.

⁷ Man c'a tich'üc-ivi'. Roma ri Dios man jun nch'acon richin. Cachi'el tok nitic-ka jun ixin, ja chuka' ri' ri nberuya-pe. Ronojel c'o c'a rajil-ruq'uexel. ⁸ Romari', si xa ja ri nkurayij roj ri nyek-abanala', jari' ri nyeq'uison richin ri kac'aslen. Pero si nkac'uj ri c'aslen ri nrajo' ri Lok'olüj Espíritu, nuc'ün c'a pe ri c'aslen cheke ri man jun bey nq'uis tñj. ⁹ Y man c'a nkucos chubanic ri utz. Roma si man nkaya' tñj can rubanic, napon c'a ri k'ij tok nkac'ul rajil-ruq'uexel romare'. ¹⁰ Y roma c'a ri', tok nkatz'et achique na vinük que c'o ri nc'atzin chin, tikato' c'a. Pero ri nc'atzin que nyekato' ja ri ye hermanos chic, y junan kataken ri Jesucristo quiq'uin.

Ri ruq'uisbül tak tzij

¹¹ Ri ruq'uisbül chin ri carta re', ja yin c'a ri nquitz'iban-e. Y titz'eta', riq'uin nimak' tak letras ninbün-vi-e. ¹² Y ri nyebanun c'a chive que tiban ri circuncisión chive, ri jun retal ri nquibün ri israelitas pa ruch'ac'ul jun ac'ual ala' que ja richin ri tinamit ri Dios, nquibün quiri' xe richin quetz'et y quenimüx que nquibün-vi ri nbij ri ley ri xuya' ri Dios richin ri Moisés. Y man ncajo' tñj c'a nquitzijoj que ri colonic nbanatñj can xe roma ri rucamic ri Jesucristo chuvüch ri cruz, roma rije' man ncajo' tñj que nye'etzelüs. ¹³ Banun-vi ri circuncisión cheque ri nyebin chive que tibana' chuka' rix quiri'. Pero re' man nbij tñj c'a que rije' nquibün-vi ronojel ri nbij chupan ri ley ri xuya' ri Dios richin ri Moisés. Man quiri' tñj. Rije' ncajo' que rix nban ta ri circuncisión chive, xaxe richin

titz'et que rix nitakej-vi ri quitzij. ¹⁴ Y nütj c'a c'o-vi chuve, que yin ninbün ta cachi'el ri nquibün rije', roma yin man nincanoj tütj nuk'ij. Yin xaxe vi ri Kajaf Jesucristo ri xcom chuvüch ri cruz ri ninya' ruk'ij, y ja chuka' rija' ri banayun chuve que xincom yan chiquivüch ri nojibül aj-ruch'ulef. Y ri nojibül c'a chuka' re' xecom yan chinuvüch yin. ¹⁵ Y roj ri jun kabanun riq'uín ri Jesucristo, ri Jun cha'on-pe y takon-pe roma ri Dios, man jun c'a nbün cheke si banun ri circuncisión cheke o man banun tütj. Ri nc'atzin y c'o-vi rakalen, ja ri c'ac'a' kac'aslen. ¹⁶ Rix c'a ri nyixbiyin cachi'el nbij ri tzij re', nc'uje' ta c'a uxlanen pa tak ivánima. Y nijoyovüx c'a chuka' ivüch roma ri Dios, rix ri ketzij israelitas, roma rix rutinamit vi ri Dios.

¹⁷ Y ri nbe-apu, man jun chic c'a tibun más tzij chuvij. Roma yin yec'o-vi retal ye nuc'uan roma ri pokonül ri xinc'usaj, y ronojel re' roma yin jun cheque ri ye rusamajela' ri Ajaf Jesús.

¹⁸ Y ri utzilütj sipanic ri nspaj-pe ri Kajaf Jesucristo nc'uje' ta c'a pa tak ivánima rix hermanos. Quiri' ta c'a.

RI DIOS NCH'O PA KACH'ABÜL CHEKE
New Testament in Kaqchikel, Eastern (Oriental); cak
(GT:cak:Kaqchikel)

copyright © 2012 Wycliffe Bible Translators, Inc.

Language: Kaqchikel, (Kaqchikel)

Dialect: Eastern

Translation by: Wycliffe Bible Translators, Inc.

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Kaqchikel, Eastern

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

please contact the respective copyright owners.

2014-04-27

PDF generated using Haiola and XeLaTeX on 11 Nov 2022 from source files
dated 29 Jan 2022

dac29dea-1b2e-5d4f-8d87-c83909b57740